

Powšitkowne WOZJEWJENJA

njedźelu, 26. februara 2012

Póstne seminary w Smochćicach

Hłowna tema lětušeho rjada zarjadowanjow póstneho seminara w Domje biskopa Bena w Smochćicach rěka „Mać cyrkej, wótc stat: Kotry počah matej?“ Na přěnich třoch póndźelach póstneho časa wuhotuja wšelacy znaći referenća, kaž dr. Christoph Münchow, profesor dr. Dominik Burkard, propstowka Friederike von Kirchbach, profesor dr. Peter Stosiek, póstne seminary zaso z přednoškami. Přěni k temje „Wot kejžora Konstantina hač ke kejžorej Wilhelmej. Wažne měžniki w počahu mjez cyrkwu a rajchom w stawiznach po Konstantinskim přewróće“ budže póndźelu, 27. februara. Tydžeń pozdžišo, 5. měrca, rěka tema „Mjez cyrkwiskim dawkom a nabožnej wučbu. Palace prašenja w počahu mjez statom a cyrkwu“. Třeći seminar póndźelu, 12. měrca, změje temu „Na swěće, ale nic ze swěta. Křesćenjo a jich wizije“. K zakónčenju lětušich póstnych seminarow předstaji so sobotu, 17. měrca, w ewangelskej wosadnicy w Budyšinje film „Wo ludžoch a bohach“.

Wšitke zarjadowanja započnu so stajnje w 19.30 hodź. Mjez sobuzarjadowarjami seminara je Towarstwo Cyrila a Metoda z.t. Wšitcy su wutrobnje přeprošeni.

Duchowna hudźba

Přěni lětuši koncert w rjedže „Duchowna hudźba“ budže njedźelu, 26. februara, we 18 hodź. w Budyskej cyrkwi Našeje lubeje Knjenje. Studenća cyrkwinskeje wysokeje šule a wysokeje šule za hudźbu Carl Maria von Weber z Drježdźan zanjesu twórby k pasionam wšelakich komponistow. Cyłkowny nawod chóra a hudźbnikow změje Feliks Brojer z Budyšina.

„Naša ćeta Mija“

Dźiwadłowa skupina Kulowskeho Bratrowstwa přeprošuje wšitkich na hru „Naša ćeta Mija“. Dalše předstajenje je tutu njedźelu, 26. februara, we 18.30 hodź. w Šunowje.

Kurs serbšćiny za dorosćenych w Kulowje

W Kulowskej pěstowarni Křesćansko-socialneho kubłanskeho skutka započnje so srjedu, 7. měrca, kurs serbšćiny za pokročonych. Přizjewjenja su hač do pjatka, 2. měrca, w Rěčnym centrumje WITAJ móžne, telefonowe čisło (0 35 91) 55 04 00.

Serbska narodna drasta

Přednošk a rozmołwa k temje „Serbska narodna drasta“ budže pjatk, 9. měrca, w 19 hodź. na Bosčanowej žurli w Kulowje. Zawodne słowa kołowokoło serbskeje drasty něhdy a džensa změje Andrea Pawlikowa. Kulowske Bratrowstwo wšitkich zajimowanych, tež z druhich wosadow, wutrobnje přeprošuje.

Zetkanje samostejacych

Samostejacy ze serbskich wosadow kaž tež dalši zajimcy su srjedu, 14. měrca, w 14 hodź. do Domu biskopa Bena w Smochćicach přeprošeni. Zajimcy njech so hač do štwórtka, 8. měrca, w redakciji Katolskeho Posoła přizjewja, telefonowe čisło (0 35 91) 55 02 12. Štóź chce wotewzaty być, njech to prošu zdźěli.

Zhromadny dzeń za 3. a 4. lětnik

Pod hesłom „Počas“ přepróšuje Dekanatne dušepastyrstwo džěci 3. a 4. lětnika na zhromadny dzeń sobotu, 17. měrca, wot 9 do 15 hodž. do Don Boskoweho domu we Worklecach. Zajimcy njech so prošu hač do wutory, 13. měrca, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdžělnika přinošk we wysokosci třoch eurow.

Putniskej jězbje do Fuldy a Wilny

Cil třidnjowskeje putniskeje jězby je tónraz Fulda, hdžež wopytamy row swjateho Bonifacija. Jězba z busom wotměje so wot srjedy, 30. meje, do pjatka, 1. junija. Přenocowanje je w klóštrje oblatow w Hünfeldže předwidžane. Tydženska jězba powjedže putnikow wot soboty do soboty, 11. do 18. awgusta, na marijanske putniske městno do Wilny w Litawskej z přebytkom w Gdańsku. Přizjewjenja přijimuje Terezija Kubašec w Radworju, telefonowe čisło (03 59 35) 2 04 25.

Nětko tež za ministrantki a ministrantow 7. lětnika

Prózdniške dny w Zakopanym

Towarstwo Cyrila a Metoda (TCM) přewjedže za ministrantki a ministrantow tuchwilneho 7., 8. a 9. lětnika, kotřiž aktiwnje k wołtarjej služu, prózdniške dny w Pólskej. Tutón dowol ma wot štwórtka do soboty, 9. do 18. awgusta, w měsće Zakopanym we Wysokich Tatrach być. Wšitke ministrantki a wšitcy ministranća mjenowaneje starobneje skupiny su k tomu wutrobnje přepróšeni. Budžemy pućować a so w přirodže Wysokich Tatrow wočerstwjeć. Pojedžemy wězo tež do bliskeho Krakowa, zo bychmy sej Wawel, Rynek a Wieliczku wobhladali. Dyrdomdejski budže zawěsće wulět do Słowakskeje, hdžež wočakuje was jězba na splawach. Financowanje tutech džesać dnjow je sčěhowace: Starši měli na ministrantku abo ministranta 160 eurow zapłaćić. Darićel wjetšeje sumy, TCM, wosady a Założba za serbski lud prózdniški projekt podpěraja. Z tym su transport, přenocowanje, zastaranje, wšitke wulěty a zastupy zaručene. Lube ministrantki a lubi ministranća, přizjewće so **prošu hač do pónđzele, 5. měrca**, w redakciji Katolskeho Posoła, telefonowe čisło (0 35 91) 55 02 12 abo z mailku na Katolski@Posol.de. Wočakuja was woprawdže wotměnjace a wočerstwujace dny. *Jurij Špitank, předsyda TCM*